

- पैली रा प्रधानमंत्री अटल बिहारी वाजपेयी री 100वीं जयंती सुशासन दिवस रा रूप मांय मनायी जावे-मुख्यमंत्री भजन लाल शर्मा ई मौके राज्य री सगळी ग्राम पंचायतां मांय अटल ज्ञान केन्द्र खोलण रो ऐलाण कर्यो।
- प्रधानमंत्री नरेन्द्र मोदी मध्यप्रदेश मांय केन-बेतवा राष्ट्रीय नदी जोड़ो परियोजना री नीव धरी।
- केंद्रीय गृह अर सहकारिता मंत्री अमित शाह दस हजार ऊं बत्ती प्राथमिक कृषि, सहकारी समितियां, डेयरी अर मछली पालन सहाकारी समितियां ने देश ने समर्पित कर्या।
- आथूणी विक्षोभ रा असर ऊं प्रदेश मांय करडी ठण्ड रो दौर चाले-आवता दो दिन कुछ ठौड़ां माथे घणो कोहरो छाया रहवण मावठ री आस।

000

पैली रा प्रधानमंत्री अटल बिहारी वाजपेयी री सौवीं जयंती आज सुशासन दिवस रा रूप मांय मनाई जावे। ई मौके राष्ट्रपति द्रौपदी मुर्मू, उपराष्ट्रपति जगदीप धनखड़ अर प्रधानमंत्री नरेन्द्र मोदी दिल्ली मांय सदैव अटल स्मारक माथे पुष्पांजलि अर्पण कर ने वां ने श्रद्धांजलि दी। गृह मंत्री अमित शाह अर लोकसभा अध्यक्ष ओम बिरला समेत केई केन्द्रीय मंत्रियों अर नेतावां अटल बिहारी वाजपेयी ने श्रद्धांजलि अर्पण करी। ई मौ सुशासन री शपथ लीरीजी अर अटल बिहारी वाजपेयी रा सिद्धांतां माथे चालण रो संकल्प करी ज्यो। वठे ई प्रदेश मांय न्यारी-न्यारी ठौड़ां पैली रा प्रधानमंत्री अटल बिहारी वाजपेयी री जयंती माथे न्यारा-न्यारा कार्यक्रम व्ह्या। जयपुर मांय भाजपा मुख्यालय माथे व्ह्या कार्यक्रम मांय पार्टी रा प्रदेश अध्यक्ष मदन राठौड़, मुख्यमंत्री भजनलाल शर्मा, सांसद घनश्याम तिवाडी अर पार्टी रा ठावां नेतावां श्री वाजपेयी ने श्रद्धांजलि अर्पण करी। ई मौके पैली रा प्रधानमंत्री रा जीवन दर्शन माथे लगायी ज्यी चित्रांम नुमाईश ने ई लोगां देख्या। उठिने उधर डूंगरपुर जिला प्रशासन कानी ऊं ई मौके अटल विचार संगोष्ठी अर सुशासन रैली आयोजित करी ज्यी। चूरू, करौली, श्रीगंगानगर, पाली अर पुष्कर मांय ई पैली रा प्रधानमंत्री श्री वाजपेयी ने सिरधा रे साथे याद करी ज्यो। दौसा जिला कलेक्ट्रेट मांय सुशासन दिवस रे मौके नुमाईश लगायी ज्यी अर सुशासन री शपथ दीरायी ज्यी। भरतपुर जिला कलेक्ट्रेट परिसर मांय पैली रा प्रधानमंत्री अटल बिहारी वाजपेयी री मूरत रो जिला कलेक्टर अनावरण कर्यो।

000

प्रधानमंत्री नरेन्द्र मोदी कह्यो है के भारतीय जनता पार्टी सारू सुशासन फगत एक दिन रो कार्यक्रम नी व्हे र वां री सरकारां री पिछाण है। दूजा दलां री सरकारां रे साथै भाजपा री सरकारां री तुलना करण री अरज करता श्री मोदी कह्यो है के भाजपा री सरकारां सुशासन सारू हर पैमाना माथे हमेश करडी मेहनत करी है। भाजपा री सरकारां लोगां रे प्रति समर्पित री है। प्रधानमंत्री आज मध्य प्रदेश रा खजुराहो मांय केन-बेतवा राष्ट्रीय नदी ने जोड़ण वाळी देश री पैली पहली महत्वाकांक्षी अर बहुउद्देश्यीय परियोजना री नीव धरण रे पछे आं बात कही।

कार्यक्रम पैली रा प्रधानमंत्री भारत रत्न दिवंगत अटल बिहारी वाजपेयी री 100वीं जयंती रे मौके व्ह्यो। पैली रा प्रधानमंत्री अटल बिहारी वाजपेयी री यादां ने साझा करता श्री मोदी कह्यो अटल जी सुशासन अर सुचिता सारू हमेश प्रेरणा रा स्रोत रिया है। प्रधानमंत्री देश री पैली ओकांरेश्वर फ्लोटिंग सोर परियोजना रो भी उद्घाटन किया। श्री मोदी एक हजार एक सौ अटल ग्राम सुशासन भवनां रो भूमि पूजन कर्यो अर पैली रा

प्रधानमंत्री अटल बिहारी वाजपेयी री याद मांय एक डाक टिकिट अर सिक्को ई जारी कर्यो ।

000

मुख्यमंत्री भजनलाल शर्मा पैली प्रधानमंत्री स्व. अटल बिहारी वाजपेयी रा जन्म शताब्दी दिवस सुशासन दिवस रे मौके प्रदेश री हर ग्राम पंचायत मांय अटल ज्ञान केन्द्र सुरू करण रो ऐलाण कर्यो है ।

मुख्यमंत्री कह्यो के आ केन्द्रां सारू स्थानीय नौजवानां ने अटल प्रेरक रा रूप मांय चुण्या जायेला । वणा कह्यो के गांवाई हलका रा नौजवानां ने खुद पढ़ण अर प्रतियोगी परीक्षावां री तियारी अर लोगां मांय पढ़ण री प्रवृत्ति ने बधावो देवण सारू अटल ज्ञान केन्द्रां माथे लाइब्रेरी अर ई-लाइब्रेरी री सुविधावां विकसित करी जायेला । इण रे साथै ई आं केन्द्रां माथे कैरियर काउंसलिंग री सुविधा ई मुहैया करायी जायेला । आ केन्द्रां रा विकास माथे पांच सौ करोड़ रिप्यां खर्च व्हेला । श्री शर्मा कह्यो के श्री वाजपेयी री याद मांय राज्य सरकार 26 दिसम्बर ने सगळां पंचायत समिति मुख्यालयां माथे अटल जन सेवा शिविर लगावण रो ई फैसलो कर्यो है ।

000

राज्यपाल हरिभाऊ बागडे पैली रा प्रधानमंत्री अटल बिहारी वाजपेयी ने याद करता वां रा आदर्श अपणावण री अरज करी है । वणा कह्यो के अटल बिहारी वाजपेयी बाळपण ऊं ई करडी मेहनत अर आप रा आत्मविश्वास ऊं भारत ने विकास री नुवी राह दी है । प्रधानमंत्री रहवता वणा सुशासन रे साथै ई भारतीय राजनीति रा आदर्श मूल्यां री थापना करी । श्री बागडे जयपुर रा शांति नगर मांय अटल सामुदायिक केन्द्र मांय व्हा वाजपेयी जन्म सदी जळसा मांय बोल रह्या हा ।

वणा कह्यो के श्री वाजपेयी रे प्रधानमंत्री काल मांय देश मांय बरोबर विकास रा काम व्हा अर भारत परमाणी परीक्षण कर ने महाशक्ति बण्यो ।

000

केंद्रीय सहकारिता मंत्री अमित शाह आज नुवी दिल्ली मांय दस हजार ऊं बत्ती नुवी थापित बहुउद्देशीय प्राथमिक कृषि सहकारी समितियां देश ने समर्पित करी । समितियां पशु-पालन अर मछली पालन उद्योग रा बारा मांय ई है । श्री शाह ई मौके नुवी बणायी ज्यी समितियां ने पंजीकरण पाना, रूप किसान क्रेडिट कार्ड अर लघु ए.टी.एम. ई बाट्या । आं पंचायतां मांय क्रेडिट सेवावां री पूग मुहैया करावण अर रोकड समावेशन ने बधावो देवण सारू तैयार करी ज्या है । श्री शाह कह्यो के मोदी सरकार सहकारिता ने बधावो दे र गांवाई अर्थ व्यवस्थां ने नुवी ताकत दे री है । वणा कह्यो के पांच साल रा लगस ऊं घणा पैला ई दो लाख प्राथमिक कृषि क्रेडिट समितियां थापित व्हे जायेला । केन्द्रीय मंत्री कह्यो के देश मांय जद बुनियादी ढांचा ने प्राथमिका नी दीरीजी ही उण बगत पैली रा प्रधानमंत्री अटल बिहारी वाजपेयी स्वर्णिम चतुर्भुज मार्ग परियोजना सुरू करी । अठिने दिल्ली मांय व्हा ई कार्यक्रम ऊं जयपुर मांय मुख्यमंत्री भजनलाल शर्मा वर्चुअल जुड्या । ई मौके सहकारिता मंत्री गौतम कुमार दक अर दूजा मंत्री अर विधायकां समेत घणी तादाद मांय लोग मौजूद रह्या ।

000

प्रभु यीशु रो जन्मदिवस, क्रिसमस आज देश दुनिया मांय रीति मुजब उमाव रे साथै मनायो जावे । ई मौके गिरिजाघरां ने मोवणा सजायी ज्या है । क्रिसमस मनावण ने ले र ईसाई समुदाय रा लोगां मांय संवारां ऊं ई खास उमाव बण्योड़ो है । कैरल्स रे साथै खास प्रार्थना सभावां आयोजित व्हा । क्रिसमस ट्री अर केक ने ले र टाबरां रे साथै ई जवाना मांय ई हरख देखण ने मिले । प्रभु यीशु रा जन्म री झांकी देखण सारू घणी तादाद मांय लोग न्यारा-न्यारा गिरिजाघर पूग रह्या है । राष्ट्रपति द्रौपदी मुर्मू, उपराष्ट्रपति जगदीप धनखड़ अर प्रधानमंत्री नरेन्द्र मोदी क्रिसमस रे मौके लोगां ने

शुभकामनावां दी है। प्रधानमंत्री सगळां ऊं प्रभु यीशु मसीह री शिक्षावां माथे चालण री अरज करी है। अठिने, राजधानी जयपुर समेत प्रदेशभर री सैलाणी ठौड़ां माथे क्रिसमस री छुट्टियां मनावण मांय घणी तादाद मांय देशी-विदेशी सैलाणी पूग रह्या है। सिरोही जिला मांय प्रदेश रा एकला पर्वतीय सैलाणी ठौड़ा माउंट आबू मांय ई घड़ी तादाद मांय सैलाणी पूग रह्या है।

000

प्रदेश री घणखरी ठौड़ां लारला दो-तीन मांय तापमान मांय कमी आवण ऊं करड़ी ठण्ड रो असर बण्योड़ो है। लारला चौबीस घंटा मांय सब ऊं कम 3 दशमलव 4 डिग्री सेल्सियस कमती रो तापमान माउंट आबू मांय दर्ज करी ज्यो। वठे पिलानी, श्रीगंगानगर अर चूरू मांय कमती रो तापमान 6 दशमलव 6 डिग्री सेल्सियस दर्ज करी ज्यो। चित्तौड़गढ़ मांय आज दिन री सरुआत सीळा बायरां अर हलका कोहरा रे साथे व्ही। कोटा मांय ई आखे दिन बादळ छायाी ज्या रिया। बाड़मेर आज दिनभर धुंध छायाी ज्यो रह्यो अर सीळी हवा रा असर ऊं ठण्ड बध ग्यी। श्रीगंगानगर मांय करड़ी ठण्ड ऊं आम जिन्दगी ऊं असर पड़्यो है।

मौसम केन्द्र जयपुर मुजब राज्य मांय कठे-कठे ई आवता दो दिन घणो कोहरो छायो रह सके है। काले ऊं एक और नुवो आथूणी विक्षोभ सकिय होवण री आस है। इण रा असर ऊं जयपुर समेत केई जिला मांय मावठ व्हे सके है। मौसम महकमां मुजब विक्षोभ रो सब ऊं बत्ती असर 27 दिसंबर ने रह सके है। इण ऊं कठे-कठे ई ओळा पड़ण रो ई अन्देसो है।

000

कोटा महोत्सव मांय आज साफा अर मूँछ होड़ जसी लुभावणी गतिविधियां व्ही। कोटा ने सैलाणी अर सांस्कृतिक हलका मांय ठावी पिछाण दिरावण सारू व्ह्या ई कार्यक्रम रा खास महमान विधायक संदीप शर्मा हा। श्री शर्मा कह्यो के कोटा री सैलाणी हलका मांय ठावी पिछाण है। अठे मथुराधीश मंदिर, मुकुंदरा हिल्स, जीवनदायिनी, चंबल नदी अर जैविक विविधता दुनिया भर मांय आप री न्यारी पिछाण बणायाी है। होड़ मांय ठावां प्रदर्शन करण वालां ने ईनाम ई दीरी ज्या।

000